



UKA 2017/65

12/10-2017

Randi Vestergaard Evaldsen

**Kommunit inatsimmi peqqussutaasut naapertorlugit pisortat ikiorsiissutinik tunniussinermunut atatillugu qanoq annertutigisumik ikiorsiissutit aningaasannornagit tunniussisarnersut misissoqullugu Naalakkersuisut peqquneqarnissaannik Inatsisartut aalajangiiffisassaattut siunnersuut. Misissuinermut atatillugu aamma innersuussutinik saqqummiusseqqunneqarput inatsisitigut qanoq pitsaanerpaamik kusanarnerpaamillu qularnaarneqarsinnaanersoq, atisassat aamma allat meeqqat pisariaqartitaat eqqarsaatigalugit angajoqqaat kiisalu allat meeqqanut angerlarsimasunut isumassuisut qulakkeerisalernissaat siunertaralugu.**

(Inatsisartunut ilaasortaq Nivi Olsen, Demokraatit)

(Siullermeerneqarnera)

Demokraatit Naalakkersuisullu isumaqatigiissutigaaq inuiaqatigiit meeqqat sumiginnarneqartarnerat annertuumik ajornartorsiutaasoq, tamanna arlaleria isumaqatigiissutigereerparput. Aamma isumaqatigiissutigaaq amerlavallaat pisortat ikiorsiissutaannik pisartagaqartut. Taamatullu aamma isumaqatigiissutigaaq pisortat ikiorsiissutaannik pisartagaqartut akornanni amerlavallaat atornerluisuusut.

Tassunga atatillugu ajornartorsiutit annertuut ilagaat, atornerluisut atornerluinertik qitornaminnut naleqqiullugu pingaarnerutittarmassuk. Tamatuma kinguneranik meeqqat kaattarput iluamillu atisassaqaratik. Inuiaqatigiittut tamanna isiginngitsuusaarsinnaanngilarput. Ajornartorsiut piuvoq, iluuseqartariaqarpugullu ajornartorsiut isiginngitsuusaaginnarsinnaanngilarput. Taamaattumik Inatsisartunut ilaasortaq Nivi Olsen ilumoorpoq pisariaqarsorigamiuk kommunit ullumimut naleqqiullugu annerusumik pisortat ikiorsiissutaannik nerisassannorlugit tunniussisalertariaqartoq, taamali kommunit peqquneqartinnagit naapertuutissaq misissoqqaassallugu nerisassanik ikiorsiissutitut tunniussisarneq kommunit qanoq annertutigisumik ullumikkut atortarneraat. Siunnersuutillu matumap tamannarpiaq siunertaraa.

Naalakkersuisullu ajoraluartumik isumaqarput siunnersuut itigartinneqassasoq. Demokraatiniit isumaqarpugut tamanna uggornartoq. Soorlu allareersugut, meeqqanut tunngatillugu annertoorsuarnik ajornartorsiuteqarpugut, sumiginnarneqartartunik angajoqqaat atornerluinerat pissutigalugu. Tamanna tunngavigalugu meeqqat sumiginnagarpasuit ikiorsinnaagaluarpagut, isumagisinnaasuugutsigu angajoqqaat atornerluinermunut pisortat ikiorsiissutaannik atuisinnaajunnaanrissaat, ikiorsiissutillu taamaallaat atornerqartassasut meeqqat ulluinnarni pisariaqartitaannut soorlu atisanut nerisassanullu.

Demokraatini meeqqat tunngaviusumik pisariaqartitaat tamanit pingaarnerpaatippagut. Neriuppugullu partiit allat tamatumani ilalerumaaraatigut sinnersuuterput akueralugu.

Siunnersuut inassutigaaq akuerineqassasoq suliareqqinnissaalu Ilaqutariinnermut Peqqissutsimullu ataatsimiititaliamut innersuullugu.